

藏

密

齋

集

藏密齋集卷之十八

嘉善魏大中孔時著

書牘 五

答周縣貞

應天撫院

其在今日公論不患不明而患無行之者行之者之人似自以其太阿授之內代爲窒其意之所不欲與擊其所忌向之名君子而中道躓者躓而起自謂立筦要樞號令天下小未遂不免以其傾小人之智傾同人蘖芽見端是大可慮

點陪之策圖一網而盡四賢少宰巋然如靈光
意未帖如也其機頗幻其說頗長未易楮罄寒
鄉臭味落落晨星丁愼老不可以卽出劉念老
復拂衣而南予丁孤蹤曷其有極實微惠顧不
遠千里錫我司南耳疏執織造不獨惠吳浙之
父老子弟實嘉賴之謝謝

癸亥十一月初一日

又

袁之撫閩無狀至劾竇方伯備計典而一時賢
者幾空國而去惠微卹典計非尊者本念遂代

爲任怨知不以爲訝也

答王半菴

山東撫院

踞讀大教舉全齊之病楚一一數之如指諸掌
入暗室者久始明何以望表而睹其裏若秦越
人洞五藏于垣一方也知病審方予以劑君臣
佐使之妙而標本治之行霍然有起色矣青齊
天下之腰呂台臺填其地豈徒齊民安周公太
公所以報政者拭目俟之矣

癸亥十一月初一日

答孫拱陽

陝西撫院

所景海內名賢不可以數計而蹟而再起者不
無聞捷之思賢者亦默然取容耳其孳孳世道
不恤手口拮据如時曩是唯先生故椎闔如中
奉教備至循例再入啓戟在泰遠我典型如蹈
空谷西方美人可勝惆悵耶

癸亥十一月初一日

答商老師

人有其卻也而偵偵有其卻也而借借有其卻
也而起而排之不遺力大中通籍以來十五在
室十三在途在都者不能以十二所攝邸抄絕

少又辱在師門無過而訟師臺者竟不知老
所卻者何事今脩卻者何人而將起而借紅夷
以爲題也禦奴者戰守無定筭征安者剿撫無
定形顧其時何如而驅苗者得執異日之剿以
諭爲罪耶且苗以海爲家風帆飄忽剿將終不
可得乃先日兩次所得獲殺傷亦何嘗不用剿
也要在得其卻之之人與其卻之之事而從中
導其竅而銷之苟微遠不卽阻越必得一當以
報所最患苦者人好以方隅自小卽方隅中又

畫方隅而二之說說不休莫可如何耳有便望
一一以示中中不敢負其借者其不必爲之辭
者也日者走蒼頭候萬福不能將未將之萬一
辱貺加腆媿汗如雨虎子來復承教貺惶悚倍
萬然不敢以不拜二緣少伸鄙悰黑頭開府返
子舍舞斑爛卻者之予老師亦不薄乘除有數
道亦委蛇爲蒼生思安石東山非可以久卧也
癸亥十一月初一日

答岳石梁

順天撫院

人墮地一室也其登朝則比肩而寧一人也何
彼何此爾疆爾界我方以浙自爲而人誰與浙
我以非浙自爲而浙又誰與我計惟舉心盟念
在朝家不在牆壁出口論事據是非不占勝負
司千古之大同乃不隨六年而一轉今奈何人
之相浙與浙之相人猶介介於浙與非浙之間
而格格焉其不相入也有志之士所以拊膺於
歌者苦而知音稀也謬不自量布其區區猶懼
高明存乎見少辱報札不以爲非也而吐之甚

不書牘

荷甚幸因如教過袁侍御而問之則又以此中
按君所聞四州縣失事爲台臺縱賊之效且再
疏以聞不肖又不自量再四款解袁侍御亦不
以不肖爲非也而吐之疏乃中止然則不能水
乳合也亦不至如水投石也已矣有心者爲地
方得人計甚殷拂衣之志未可決也

癸亥十一月初五日

答吳澁石

南昌司理

弟與方石兄同舍語次每及年兄弟故知年兄
甚淡品望既隆資俸亦久糠粃之質偶被簸騰

其望得左右手甚於恬處者之自爲而例不得
不再假歲月以須其候所謂庶幾夙夜以永終
譽者也尊貺心領之槩不敢承恐生異同非敢
妄自非外徃嘗以敝座師戴玄趾之後人相託
今無恙乎

癸亥十一月初五日

答王滑縣

名任杰

憶邂逅北城蕭寺時枯木撐枒水澤腹堅凍雲
不飛繁霜在地已得稱同籍而弟爲郵人兄乃
出牧道塗一值交臂失之年兄以艱歸歸而起

起而入覲第碌碌牛馬間不能如邂逅時之事
暇而意傾也偶以糠粃之質簸揚在前要以自
期期不失初晤時如枯木老禪一片寒冰已矣
年兄許之乎

癸亥十一月初六日

答蕭元恒

江北學院

朝端每爲一二倡邪說而有能者所壞其人豈
非庠序間所稱能文章之士耶標新競爽而好
用其心於離跂仄阨之場憂憂乎纖薄谿刻是
務安得不詭於正然則其軋苗者其所以爲競

者也士之束書不觀而荒於嬉者害止其身其
能文章者害乃在天下國家衡文者日閱數十
百卷皆束書不觀而荒於嬉者之文得一二標
新競爽之文安得不亟賞之而亟拔之孰知其
貽害於天下國家者竟斯人也南國士習爭驚
於文而特重知言者以司文章之命知必於新
爽中尤擇其不詭于正者而後賞之而後拔之
異日之立朝者問爲安定先生之門人而造福
於國家者宏也

癸亥十一月初六日

答王述文。

日者輦轂之下橫議如沸。賴年兄以其斷鰲之手時爲撐柱。不然天之幾墜者亦數矣。蜂螫微毒似不必過爲介介。而年兄毅焉拂衣以爲功。成可以掉臂歟。富貴之場君子小人共之。獨邪正互持之際。途徑頗清。手眼易着。迨其胥而小人也。卽小人與小人爭。不必其與小人爭者。卽君子也。而今日且思以目君子之日。其胥而君子也。卽君子與君子爭。夫爭也。而可以言君子。

耶而又不取驅之爲小人此際迺正難耳迺年
兄旣去南國而歿者艱者繼聞天南半壁又墮
杞人之憂將奈何雖暫假六月之息尋當借長
北臺顧無如目前何也

癸亥十一月初六日

答樂昌王

曩者捧冊而世大王于朔朔風正厲中牒如殿
大王忘其貴重出餞農郊殷勤惜別浮雲西馳
此景如睹五易星霜未繇聞問緬想說禮說詩
爲善最樂也遠荷翰貺誼不克當懼尊者討其

不恭敬拜巾帕以識明德諸惟順時珍重不宣
癸亥十一月初六日

答陸筠脩

世之於弟與弟之於世總落落耳乃一念縑衣
之好不勝神往不啻口出卒然相遇于風塵牛
馬中而得之誹譽親疎之外不顧其言之不足
以重人與人之不賴若言而重而嘒嘒其不置
也每言出而自慚而久之且間有採弟言以爲
券者則賢者之聲實自符於弟何與焉矧如台

丈者之足以自致於青雲也運艘之滯不料理
于去冬之回空而迫需之今日之抵灣此事恐
須以數年之通制國用而及今斟酌之今不爲
必後必有噬臍之悔河方怒而議上洪腹且堅
而議挑淺恐大禹之所不能爲也

癸亥十一月初六日

答呂渭陽

淮安潛院

熾次淮陰辱旌旗子子寵賁江干教誨綢繆引
爲後進竊懼語無倫次顛末未詳不足以入尊
者之聽遠蒙垂訊佐以餐錢亹亹之誠勤于提

耳則又不肖爲桑梓請命之會也夫民輸粟而軍代民而轉輸軍誠勞顧念其勞也而三百石中有一百石之贏又行糧輕齎蓆枋諸用頗溢其自帶土宜者不與焉則所以酬軍者亦不薄矣而軍欲無厭故詆米爲濫惡以益其耗耗愈增陰以便其折乾之私民亦畏其增耗而利其折乾于是積胥得資緣爲姦利姦軍姦胥姦民相倚爲姦利而良里之受勒不可殫訴其姦里之得資緣于姦胥與姦胥之得資緣于姦軍素

在衛縣相配歲不改調面熟計生日甚一日致然嚴州之屬敝邑者四十餘年矣次則杭州撥兌一事台臺爲政嗣今撥兌查今歲某衛所兌過某州縣者明年悉與更換庶軍與胥徑未習而害不淡此不獨敝邑一邑之利也其大患則又在回空之遲上之人方計過淮過洪之速而軍必飽其慾而船始開軍于是挾其遲以徼上之人左袒我而剝民而飽其慾且日遲一日究必有一日遲而不可爲者爲之是在今日台臺

必有長策以制國用而通其窮者王計者所願聞也

癸亥十一月十二日

答賀立菴

山東學道

孤行一意者每每不得行其意何也孤行一意必有不可一世之意世又誰許吾爲可耶世不吾可吾意必不得行抱而自知焉已矣設吾旣不可一世世乃以吾爲可而吾意得行而吾之福澤于吾所不可之天下無不增遂則從古無此孤行一意之便宜人也要此爲淺衷曠質以

其不可一世之意千古自命抑鬱無聊世目之
爲異物彼亦逃虛自稿焉者云耳若義以爲質
察言觀色慮以下人宜無不得達者其有不達
則自反之君子所不得不置爲妄人而終不敢
以鄉人自處者也請託不行是分內事卽其敢
爲訾議者不過曰不勝歐陽之懼而穎士有不
得前者卒不敢曰不公若以近所聞則無禮寔
甚人情所不堪孤行一意者更不能堪矣加人
以其不堪與不能受所不堪者本末無不明於

人人無以此芥蒂兩日圖有所效以復出門每
不得偶罹太稽尊使遂鹵莽以報侏儒一囊粟
已足自飽不敢以珠桂再厯尊念然非敢自非
外也 癸亥十一月十二日

又

徐肩老悉台臺所遭併及所聞於司選者一再
過冢宰始得聞冢宰故悉此君且云東人言所
首文輒不佳文亦未嘗不佳未爲不知台臺矣
因及台臺生平具入夾袋中但關白陞遷其向

時人甫峻第亦未能輒言容更爲台臺圖開未
知終何如也

答徐泰校

人情之貴北也甚于南貴以其徵逐耶貴以其
餽遺耶以其徵逐也餽遺也而情面生而是非
亂而賢否混淆南中有之乎每當紛紜狂惑時引
領南天一疏剖覈而定國是所以南中清議獨
重今曩地執固有然者乃地又以人重腹清眼
清手清而議始清也方今領裏清議獨恃年臺

疏發人財中世膏肓之疾顧何以振第乎第身
處北第心處南南之議常處後一發而破的第
之議偶處前一發而叢矢則第又不幸而在北
也尋仲殤益吾艱述文予告可勝悵惘岱麓春
薄立宇存愚諸兄弟相朝夕未爲落落也

癸亥

十一月十四日

答劉方壺

陝西按院

河南南陽幾不可問而未始不可破廷寢威
稜過而問之所恃祖宗之法與臣子之職掌

存焉耳若與之共爭於取旨之如攜勝負其之
矣秦以其營封之熟徑自營惛于驄馬之馭行
行且止若所以批答大疏者已不在季孟之間
乎卽撫疏微旨庶幾明晰而平頭奴何以不付
之強項也

癸亥十一月十四日

付淨兒

詞與意題固無所不受妙處在題情受之妙達
題情自生變化人奇我文爲粉而不知我固以
題爲因也文所以奇在格法不在詞與意也時

刻中有題情入妙世法必收而我力所能赴者
選數十枕以爲師題目入手汨汨焉神與俱來
善矣變化處大雅而不佻善之善矣

答臧止菴。

弟之哢哢向人也人笑之而弟不自知其可笑
冀於百千萬億人中百千萬億言中有一人於
一言相證發也言者可以無恨迫切呼號每噪
于不相知者之耳况對年兄而有不肝鬲盡傾
者哉何也年兄于百千萬億人中庶幾其非以

弟爲可笑者也對而欲盡別而相思地遠時長
形之夢寐慎所先生不卽起而舉朝望爲景星
亦時過而相證發乎衙門遷轉大都論俸轉眼
便當司天下是非邪正之衡宏養無煩取辦于
今日然古人惜寸陰也石父母素傾慕其人得
年兄言尤信復初遂作古人令人惘惘夫形軀
不能固如金石而妄思長保其附身之物作不
瞑目之事出不瞑目之語瞑目時竟究何如弟
所以嘵嘵向人者亦圖于瞑目時目瞑耳年兄

許之乎

癸亥十一月十八日

答顧平湖

名國寶

聲氣所屬每每出條教語言文字之外而河山
不能阻也矧朕受一塵晴雨同量謠俗時聞沾
河之潤等于蒙霧而心口不靈如聾如啞有血
氣者能歟否乎貴座師相對輒以其地相量台
臺水能濡乎火能燥乎何入不可而猶以濕之
與燥時擬議于其間也

癸亥十一月十九日

與練任鴻

漕兌法正米百石加耗四十石制也其在敝鄉
不知始自何年合正耗米百石復私加之九石
八斗是正米百石加耗乃五十三石七斗二升
矣潤外之潤尖外之尖誠如尊教所云而旂軍
爲厲于九石八斗之外增之不已又多方其名
色如綱司伍長倒羅之類不與焉而若輩徒付
之呼盧之一擲與酒家之一醉耳東人之子所
以顧舟人之子私人之子而潛焉出涕也今歲
嘉善平湖始復九石八斗之舊而尚不知此九

石八斗者之非制平湖之才高嘉善之心苦而
不能盡獲諒于上要之奉漕規以不至剝民而
徒以飽無賴之軍上之心無以異于其令偶未
晰舊制云云耳方且翁公祖之於年兄其情分
無以異於弟之事年兄年兄董漕政而更一婉
言盡言之當無不如命敝鄉府廳之筭糧者無
以異于縣佐貳恐不可以輕委也二書稿略附
覽尚容面爲維桑請命

癸亥十一月二十二日

答丁養凝

接手書仰見令叔祖德意其代餉亦錙銖視之
泥沙用之耳以積穀賑饑異日者及一人活一
人及百千萬人卽活百千萬人功德真無量也
癸亥十一月廿一日

答張燦衡

鎮江而南以接錢塘本塊土而制地者分而二
之中藏震澤外負江海徐邳淮泗以暨舊京所
在生心如呼與吸澄清之使攬轡而南搜奸剔
充令說劍反於詩書屠狗歸于牛犢奇伎淫巧

不作而一驚於農桑豈獨穀郡之理敝鄉之父老子弟實食其福勢相唇齒誼篤瞻依翹望南雲不勝殷切 癸亥十一月廿二日

與練任鴻

竊聞一趨督漕艘之法謂禁其攬載不得覈其攬載不得惟每艘印一空簿給之簿每幅量其廣狹作方格若干方格大小與州縣印等兌糧完日運官持簿赴該州縣于格內填註某州縣糧若干于某月日完完開船訖卽以該州縣印

蓋其上嗣後每日行程至某地方計若干里者
運官自填遇阻風處所運官復持簿赴阻風州
縣代與填註亦以該州縣印蓋其上其非有阻
礙而行程擔閣者嚴行責比過淮抵潮督漕倉
院竝與叅稽回空之法亦復如是薦劾一以早
晚先後爲叙此聞之禮曹韓泊如泊如令丹陽
久知漕事悉於國計多所討究似得其要領漕
事之在今日日遲一日將不可爲年允裁以爲
可卽疏行之于漕事大有裨也不敢不以聞

奏

庚子十一月廿五日

答孫拱陽

陝西撫院

每披大疏而欽爲虎臣也已幸比隣而親爲威鳳也然不自意其疎闇之質而荷不見鄙於大君子也節鉞在秦秦得百二焉中朝同心之儔失左右手有一事必曰拱陽拱陽有一語欲商曰不得拱陽拱陽而輿情台望何如也薊虜之款敗督臣以艱歸有欲任之者而人弗許有欲避之者而人又弗許一再屈指行及台臺台臺

之心之力亟則赴之但不肖之亟中一切甚於其
邊耳 癸亥十一月廿五日

答劉范董

山西撫院

吾黨向在阨運而阨而起者微委蛇其跡以覩
隆汙抱寸丹具正眼獨特台臺而爾時主爵者
不慙留中朝司天下人材之衡而隅用之乃今
日而訝君實而思老泉也方內民窮財殫矣有
一家哭斯免于一路哭轄下猶有望風而未肯
解綬者乎想當事者所樂聞也士氣衰颯伏莽

實繁同志者需辨姦論甚亟寧令大賢久滯一隅不爲中朝計耶

癸亥十一月廿七日

答錢昭自

勞苦凡臺久而世必欲以其分內者相誚兄能以藩伯銜再淹少時節鉞可捷得儻更一逸地則當其勞尚呼之不應矧逸處耶便羽更一相聞望望

癸亥十一月廿九日

答馬胸水

浙江按院

天惠海邦假重台臺按行其間一時父老子弟

所疾苦于臚傳風聽中沐衽席於簿書期會之外廟堂之上表櫺旌蒲召置直臣於左右而父老子弟若奪之父母之懷中而棄之幸繡斧巡蒞終惠海邦而後謝事而喜可知也不肖辱在編氓雲霓之望與父老子弟憂喜共之顧未獲晉拜階墀展其治民之誼缺缺實甚遠荷汪存惠書分俸感之兼愧何能已已今日者海邦業不能久稽袞繡之歸而在浙浙重在朝朝重併亦未嘗不重浙則不肖不得不去其浙之心而

側耳而聽星辰之履也

癸亥十一月廿九日

答畢白陽

魏水遡游而下泖東不百里而近聲相接也有
翁臺之爲理而皦然不滓者乎京師之去津門
數百里而近聲相接也有翁臺之覈商而不憚
此眴眴之目與吹吹之口者乎伍旣虛而飼兵
者又不勝繼翁臺今日而總詰戎之任矣更以
詰關門轅可及歟否也徃之理雲間也而當事
者以常調事翁臺今非其時矣在邊則邊重在

朝則朝重寧不復知所以重翁臺耶

癸亥十一月廿九日

與錢御冷

愚矣哉弟也今日而知向之所分爲君子小人者總是要作官要錢也途徑偶然不同耳勢不得不干君子一途取之聖王窮民畢竟總不相關切也冢宰副院巍然足仗而獨拍難爲恐亦將終付之如之何如之何也鵷鷺成行誰堪出而任事也東事起靠川舊雨新知逆東事急欸西虜而欸敗前車不鑒又將封篡賊之朝鮮而

思藉其力也士氣衰頹朝論不光已至于如此
如此也張蓬玄爲同鄉所累要之此人有九分
畢竟壞不了諸賢過疑也漕允事撫按漕府一
一與之細論練任鴻更明晰謂是九石八斗者
是潤外之潤尖外之尖非制也康父母不及作
書晤間幸致此意以終前美幸甚幸甚

癸亥十

二月初一日

答李緝敬

弟向者得微叙差而出自分一丘已矣而明例

以托疾高臥遣人繳節者爲委君命于艸莽兼
一二蒼頭冥頑無可使循例報命碌碌牛馬面
目自憎抑微有不解者徃謂其錮高賢於林壑
也而今且蹉蹉而登朝矣旣謂其薰蕕之雜薦
也而今亦庶幾其君子稱道長矣王德民窮吏
氛吏蠹顧何以異於彼一時微觀世所稱君子
者抑于何所用其心也繡衣使者按行方內激
揚所至山岳動搖然何如爲令令久于其地手
足無所不得展令苟賢其民真若赤子之乳于

其母願一邑已矣繡衣使者能使令無不賢而
赤子無不得乳于其母則繡衣使者之所及逾
廣且長知人愛人所以合併于舉直錯枉中也
如何如何日受陳乞者所苦大疏爲古人千古
而當事者微致揶揄此不可曉少宰之久速其
用意微異于時賢南冢宰以待吉水先生待長
安以南總憲此時賢公心然未知後來機括何
如世機如浮雲白衣蒼狗倏忽變換果不可定
兄以例暫息弄子讀書真有餘味斟酌飽滿字

宙在手沛若江河天之以斯時假吾兄也真切
真切弟時爲山公言鳳高先生山公固知之不
久當入啓事便中幸勸鳳翁出山以竟其志弟
有疾於膏肓吾兄所知元何以起弟
癸亥十二月初四日

答韓叅嶺

江西撫院

每覲芝宇如飲醇酎周規折矩在汪汪千頃中
所爲望之敬生卽之意消也不肖椎闢無似正
如枯木槎枒了無生意吾無煖態人亦報之白

眼揣分宜然每偕方石讚羨巖巖望玄度爲後生
典型台臺何以亦有愚不肖於意中而儼然惠
問耶民生日蹙患在貪吏望風解綬者若而人
郡邑無貪殘之吏而清淨寧一以撫之知飲耐
者徧江以西也

癸亥十二月初五日

答張蓬玄

保定撫院

世之信聊城也以其信台臺今非有疑於台臺
也獨以其疑聊城聊城所以見疑在點陪之一
算果爾聊城亦已贅矣不肖旦暮望台臺之入

以夾輔聊城而人恐台臺之化而爲聊城也則
世固未有知台臺者台臺不化人而化于人耶
見龍先生所作青白眼微與時賢異今以其一
腔熱血以百畝之不易爲已憂面目黧黑手足
胼胝終歲勤動而無以益太倉之鎔銖與關餉
之泥沙斯亦至苦而揶揄之者不休而台臺之
信而理之者亦不休此亦見疑之一端也邇妖
事叙功輿情謂此舉不無小濫薊遼急成謂頃
受延世之賞者無所逃其責此匪獨爲台臺一

人言也其中有實爲封疆者謂惟台臺足勝此而愉快則固信台臺而弗疑者而非以疑台臺也獨不肖謂此固台臺所長而用台臺于此猶未爲用其所長腹心之地得有轉移卽禍迫肘腋猶爲癰疥惟宜之知此意耳辱垂教敢佈見聞幸秘之郵筒之便望教甚切必損俸爲侑與者不可常受者不敢當幸勿爾爾也

癸亥十二月初五日

答田平谷

憶於禹凡坐中接年兄禹凡於弟同門今念之

不置年兄爲令復落不得意而感可知也恩之所暨無乎弗霑原不與考滿一例寧爲年兄靳耶尊貺心載之例不敢登不敢有異同也

癸

亥十二月初五日

答吳生白

當事者採望於吾鄉則首台臺及海門先生京卿節鉞欲內外開通以明統均之義則藩臬中之賢者又無首台臺而台臺晉擢指日矣不肖以台臺之初受官與輪環于藩臬者明台臺之

篤行與台臺之恬而當事者獎恬殊亟也鼎臞
不敢再辭恐非所以事長者然得無已厚乎卽
以充借花之供無謂其不誠也

癸亥十二月朔五日

答石長興

童而景楚陽先生已未而知楚陽先生之有子
冠冕人倫也已又聞長孺先生數稱台臺稱台
臺者不獨長孺而長孺言尤信耳過浮丘讀台
臺所遺浮丘書顯晦勿問一語爲當世下頂門
針矣世局橫分無不君子君子自詡而作官一

念隱隱焉其根于心然則所稱君子對世界醒
觀小人爲相去以寸耳按之不知不愠之脈絡
實隔萬山乃今又知台臺具龍德確乎其不可
拔也頃同志著生死論自厲令柔筋懦肉陡然
壁立顯賤勿問而問生死乎台臺試再勘之以
爲如何也庶幾夙夜以永終譽

癸亥十二月初五日

答徐楚石

展玩所惠菜圖不勝漢陰之想此意此味俯仰
同之顧能做得一事否也慙甚慙甚曾作一札

托僧募丈謝復不知曾徹台覽否鼓鑄者不通
其來之源而多設夫開之局源日涸局日多以
爲其利與幾弟承乏青差歲底紛如蝟毛有間
又遇貴堂翁在假每不得值當請于主者以定
着報台丈也

癸亥十二月初五日

寄吳士英

宜陽簿

知宦況不甚佳顧佳境亦絕少矣令君已託同
垣致意聞已有年相與間惟有一至誠耳事有
可商確者當委曲盡心相告權利所在形迹不

可不自引避也

癸亥十二月初五日

答貢東陽

知臺下以縉州因次見益以知臺下也清溪赤
石間生聚幾何而募之而死之而逃之而追之
而旋思生聚之不費一腔心血耶隆貺下及心
載之士夫精氣磅礴往來寧假此數數也

癸亥

十二月初六日

答田玉溪

江西按院

鷄鶩成行卑者以營此官穎者爲其同志互營

此官有爲窮民營其生者乎民之無生以其無
吏吏寔廢民以生而台嚴如迅雷臨其上不望
風解綬耶圻見褰帷行部江以右黃童白叟無
咨嗟愁嘆之聲也時事孔棘在遠不忘以其巡
方之餘奏長策拭目俟之矣

癸亥十二月初六日

答顧昌化

名謙服

少習文康之名與其文與其筦畱守之寄已於
坊刺中習門下之文而遽菴叔茂又數數稱門
下不置私心嚮往恒懼當吾世而失之近又習

兒輩屈指名士輒云崑山三顧不謂乃一家祖
孫父子兄弟也間氣不易鍾而萃之一家思把
臂海內名流四五輩此不易違交一人而盡得
之何幸何幸名流出牧自與時調不同紫溪小
僻花滿山城非關娑羅香也

癸亥十二月十五日

答宋叔茂

譬諸鶯其故呢喃於雕梁畫棟間入尋常百姓
家聊蕭闐寂應不能久春來秋去天運宜然夫
一句一讀不敢以日月程當其萬籟俱沉紅紫

艷盡爾時意味或獨此聊蕭閒寂者可與以終
古也吾輩相期誠不在去留久暫間矣顧父母
傾慕有年諸郎皆翩翩雋才也荷因緣得交名
士幸甚幸甚

癸亥十二月十五日

答過成山。

一人自爲一人一事自爲一事道理平鋪着地
本自直截分曉而載鬼觸藩葛藤不了人以疑
人事復生事商謎轉訛附題轉關日更一日不
知倒瀾之焉底也捧誦尊教數四坦懷以受當

世之加我者而且欣然若以得榮其先世爲愉
快知道况無入而不得也

癸亥十二月廿三日

答張蓬玄

有味乎世合世之解也合世者其化於人者
也持世轉世而世乃合我我固化人而不化於
人矣身世之交合不合之際誰可與微言者茫
茫世界未以可與微証要無不可顯解今日而
疑團盡解矣不肖一無所解乃其得台臺之解
則又不俟解而始解匆匆酬報不盡

癸亥十

二月廿四日

答岳石帆

鄙意以爲人自是人事自是事初自是初末自是末彼自是彼此自是此分自是分合自是合天下無一成之分合要於其是各不相涉也一腔熱血灑幾盡矣無少分益仰屋自愧今有台臺台臺執鞭策不肖頑執鞭弭也

癸亥十二月廿五日

答王洪崖

微獨其託在枌榆也抑似有臭味焉而日者人

方避弟弟益自避懼以其不解累人故不敢以
自慙就天下莫平於水有風焉倏起于青蘋之
末安能不波水善下風亦善息波亦善平可爲
今日喻論俸未始不論資不患其白首爲郎也
况有道者而處此也腆覲不敢承敬壁

癸亥十一

二月廿六日

答高老師

趙翁宰天下天下微不便翁翁亦不自便也憂
憂焉思于不便中一有爲于天下而一以爲違

世一以爲違心每嘆曰此心昧不了做不得情
事可知已老師幸過其行早一日是一日世道
仰賴趙翁仰賴初意堅欲借老師于保定以救
此一方民中等以爲以一隅用用不當翁亦俛
而聽謂公等所見大吾所爲切今勉聽公輒時
時曰高景逸來神氣便覺王也老師幸過其行
趙翁腹時痛痛輒病脾小人之偵翁幾如懿之
偵亮老師幸過其行其以少司寇借重謂地冷
或不甚觸忌云耳世道大患在六曹無一實事

在君子亦不過是要作官官腸冷而實事出機
械消太平可致此事專倚老師老師幸過其行
海外時以捷聞說者謂爲朝鮮地然無絕無影
響之理關外時以警聞說者謂被勅者自爲地
然亦恐非絕無影響也洪崖丈冀一通理前俸
謹領教圖以便致之主者念臺先生東附壁施
東致去矣大中處此偃偃靡適老師幸過其行
此大中之私乃大中非以自爲也

癸亥十二月
廿六日

答蕭馥亭。

童而習大將軍之平時也已而習將軍恂恂儒
者顧何以處將軍於豐沛間豈猶有椎埋屠狗
者欲借大將軍之名以警其狂心乎臂指不屬
贅疣自傷而東北西南屢聞奇捷在麾下者得
無有髀裏肉生之感乎

癸亥十二月廿六日

答吳儼五

菰蘆中竊聞台臺以其江門之學治繡水也班
行中竊窺台臺嶷嶷焉屹屹焉不以羣言聽熒
也弟迂世之人數親賢者將貽賢者累每每不

敢自近而驄馬於酒泉張掖間猶不忘此畸人
乎今日論才者動以應變爲難與變俱變變乃
日勞崑崙屹屹夫固有不變者存乎不變可以
禦萬變矣卽番虜雜沓將懦軍驕知台臺應之
者有本也

癸亥十二月廿六日

答樊紫葢

仲秋于役卽不敢晉叩階嬖一抒別思而超然
韻際俯仰於懷每對俗士茲念倍躍先朝浴日
之功指不一二屈乃太公被謫獨楚食報偏慳

迨止足自將而始及于常格其未艾者將在其
子若孫乃台臺復日以治行聞也治行高等不
在資俸而累資積閱復在人先主爵者何能汶
汶如此以遂翩然之思耶

癸亥十二月廿八日

與沈無回

有賢者在自謂將如何請益而碌碌牛馬面目
自憎討少分閒意思徃徃來來亦不可得真惡
趣也無謂閒曹乃仙曹耳